

Psalm 130

¹ *Es Piugerlied.*

Usde töife Abgründ rüefi dir scho lang, Jahwe:

»mi Herr, los uf mini Schtimm!

²Möge dini Ohre ufmerksam si
für mis Flehe um Gnad!«

³We du chrummi Gschichte würdsch bhaute, Jah,
mi Herr, wär chönnt de beschtah?

⁴Wüu d Vrgäbig bi dir isch,
dasme di vrehrt.

⁵I hoffe scho lang uf Jahwe,
ig säubr hoffe scho lang;
i plange scho lang uf sis Wort,

⁶ig säubr plange scho lang uf mi Herr,
meh aus d Wächter ufe Morge,
d Wächter ufe Morge.

⁷Wart uf Jahwe, Israel,
wüu d Tröii bi Jahwe gross isch,
d Erlösig binim gross isch.

⁸Är isch dä, wo Israel erlöst
vo au sine chrumme Gschichte.

Psalm 131

¹ *Es Piugerlied. Am David sis.*

Jahwe, i hami scho lang nüm wichtig gno,
ha scho lang nüm numeno mi gseh.
I hami scho lang nüm mit Grossem überno,
mit Sache, womi wit überschtige.

² Nei, i hami aapasst,
u mi säubr beruigt.
Wines gschiuts Ching bir Muetter,
so bini säubr bi mir.

³ Wart uf Jahwe, Israel,
vo itz a u für geng.

Psalm 132

¹ *Es Piugerlied.*

Jahwe, dänk a David,

a au sini Müeh,

² a dä, wo Jahwe gschwore,

s em scharche Gott vom Jakob vrschproche het:

³ »I cha doch nid i mis Huus ha,

ufe uf mis Bett ga lige,

⁴ u mine Ouge Schlaf gönne,

mini Ougelider la ruie,

⁵ bevor ig Jahwe si Platz gfunge ha,

em scharche Gott vom Jakob sini Ungerkunft.«

⁶ »Luget! Z Efrata heimr drvo ghört,

im Gebiet vo Jaar heimrse de gfunge.

⁷ Chömet, mir wei i sini Ungerkunft ga,

mir wei vor sim Schämeli abechnöile.«

⁸ »Machdi uf, Jahwe, zu dire blibende Residänz,

du u dini mächtigi True,

⁹ während dini Prieschter tröi drhärchöme,

u die, wosech zu dir zeue, lut juble.«

¹⁰ Em David, dim Diener, zlieb:

Wiis di gsaut Chünig nid ab!

¹¹ Jahwe hetem David ufrichtig gschwore;

är wird nid drvo abwiiche:

»D Frucht vo dim Liib

wirdi uf di Thron setze.

¹² We diner Sühn mi Bund bewahre,

mini Erklärige, wonine wott lere,

de wärde si - u sogar irer Sühn! -

für geng uf dim Thron hocke.«

¹³ Jahwe het drum Zion usgsuecht;

är hetne aus si Wohnsitz wöue.

¹⁴ »Für geng isch das mini blibendi Residänz,

hie wotti hocke, wüuis so ha wöue.

¹⁵ Iri Vorrät wotti rächt sägne,

irne Arme wotti gnue Brot gä,

¹⁶ iri Prieschter wotti frei la drhärcho,

die, womr tröi si, wärde ganz lut juble.

¹⁷ Dört wotti em David sis Horn la ufblüie;

i ha mim gsaubte Chünig sis Liecht azüntet.

¹⁸ Sini Finde wirdi beschämt la drhärcho,

abr d Chrono, woner treit, wird glänze.«

Psalm 133

¹ *Es Piugerlied. Am David sis.*

Luget wi guet u agnähm s doch isch,
we e Familie, wo zäme läbt, o zäme het.

² S isch wi z guete Öu ufem Chopf,
wo ufe Bart - uf dä vom Aaron - abelouft,
wo abelouft ufe Chrage vo sim Gwand.

³ S isch wi dr Tou ufem Hermon,
wo ufd Bärge Zions abelouft.

Dört häre het Jahwe nämlech dr Säge bschteut,
Läbe für geng.